




Schnitzelbank 2016


*Dank Seat, Skoda, Audi und VW,
hets zum Schnufa bald ko frischi Bergluft meh.
Mör dankid VW herzlich und för üs ischs o kli glätter,
will so hommer nögscht Wiahnacht o wieder Brötli-Wetter.*



*Vom Radar bim Werkhof hond mör letschtjohr verzellt,
jetzt honds en a paar Meter witer vorna gstellt.
Weder pinki Farb no Fernsehbricht hond en bis jetzt verdrängt,
schlussendlich hets on gschafft und dä Kaschta gschprängt.*



*Mentig, Zischtig, Mittwoch, Donschtig, und o Fritig,
z'Kriessera isch Schautorna, ma lästs i da Zitig.
Drü Täg da ischt doch glacht, nögscht Johr werds a Wucha gmacht,
und i 10 johr tornids dora Tag und Nacht.*



*Da Sadomaso-Film Fifty Shades of Grey,
setzt bi Fraua wildi Fantasia frei.
Statt Handschella hond mör d'Lösig und wissid es goht gschwinder,
Elektro Kolb ischt neu jetzt gäl, aber het no Kabelbinder.*







*Da Musig Oberriet dena loufts wia gschmiert,
o uni Geld werd neu-uniformiert.
För dia sends gsecklet wia varuckt und es seg gsi huara streng,
komisch, isch da Hälfti d Uniform scho z'eng.*



*Wer ischt alt und rund und benemt sich wia an Depp,
Geld unterschlot er o, es isch da Blatter Sepp.
Bald hockt er innara Zella, dött ischt halt nass und dreckig,
aber um da gohts im Tschutta s'runde göhrt is eckig.*



*Mör hond ghört: Z'muntlaga wird nöd richtig gsoffa,
d'Krona und d'Brennbar send nia wöcklich gloffa.
O i da Sunna loufts nüm super, me tör kon Lärm me macha,
mol luaga wia lang's i da Faba törid umma kracha.*



*Mör send niemert wo is Östriich goht wägem Giiz,
mör schaffid und mör koofid ida Schwiiz.
Es isch doch verkehrt wemma wäg da Priisa überirent,
übrigens morn giits d'Radiesli im Hofer für 19 Cent.*





*S'Wohrzeicha z'Oberriet es lauft verkehrt,
wäga Stoaschlag isch s'Schlossblatta ofach gsperrt.
Etzt werds renoviert und da isch jo guat aso,
es söl ofach nöd wia da Altsätter Stier usako.*



*Z' Muntlaga hät mer selta no so glacht,
da Tröpfli's Tiziani hät a roti Fassade gmacht.
Di neu Fassade isch ez grau, do lauft doch öpis krumm,
im Felbenmaad do tätit's nöd so dumm.*



*Noch da Wahla im 2000 und 15,
gits i üsam Bundasroot ko Schlumpfine meh.
Mör send alli trurig das du üs etz mosch verlo,
drum singid mör zum Abschid da Refrain so.*

